



2. opt





25-  
475

# DECLARATION D V R O Y

Contre le Sieur de Soubize, & autres adherants au party des Anglois. Confirmant les Edicts de Pacification, en faveur de ceux qui demeureront en leur deuoir & obeissance.

*Donné à Villeroy le 5. Aoust 1627. Et  
Publiee en Parlement le 12. Aoust audit An.*



A PARIS,  
Par A. ESTIENNE, Premier Imprimeur &  
Libr. ordinaire du Roy, rue S. Iacques, au  
College Royal, deuant S. Benoist.


---

M. DC. XLIV.  
*Avec Privilège de sa Majesté.*

THE NEWBERRY  
LIBRARY

X





**L**ouis par la grace de Dieu Roy de France & de Nauarre, A tous ceux qui ces presentes Lettres verront, SALVT. Depuis qu'il a pleu à Dieu nous appeller au gouuernement de cét Estat, nostre conduite a fait cognoistre, avec combien de soin nous auons travaillé pour entretenir la paix & la tranquillité publique, soit en gardant & conseruant entre ceste Couronne & les Princes estrangers toute bonne amitié, intelligence & correspondance, soit employant comme nous auons fait diuerfes fois en plusieurs endroiets & grandes occasions, nostre entremise Royale pour assoupir & esteindre les alterations & differends qui s'estoient émeus entre lesdits Princes: comme aussi en donnant assistance & protection à nos anciens Alliez, lors que nous l'auons iugé necessaire pour les maintenir ou restabliir dans les choses qui leur appartiennent, afin d'arrester par ce moyen, la suite des troubles que les innouations arriuées en leurs Estats pouuoient apporter. En quoy si nos intentions ont esté recognuës bonnes & sinceres, nous estimons aussi que celles que nous auons eu, fondées sur les mesmes considerations de la tranquillité publique & de l'affermissement du repos de nostre Royaume, en contractant diuerfes grandes alliances par le mariage de nos tres-cheres Sœurs, sont dignes encores de plus grande recommandation. Mais nous ne pouuons voir sans vn tres-iuste

sentiment, que la dernière que nous auons faite en Angleterre, n'aye pas eu iusques à present le bon succez que nous en auions attendu : Et qu'au lieu d'estreindre de plus en plus comme nous nous estions promis, le nœud de l'ancienne amitié qui estoit entre ces deux Couronnes, il soit arriué qu'après les infractions notoirement faites de la part d'Angleterre, aux articles du mariage de nostre tres-chere Soeur avec le Roy de la grande Bretagne, les Anglois soient encor venus assaillir & faire descente en l'Isle de Re, avec nombre de vaisseaux & gens de guerre, sans nulle cause, fondement, pretexte ny declaration. Et comme nous voyons que pour donner cours à leurs iniustes desseins, ils ont déjà pratiqué aucuns de nos subiets, ont enuoyé le Sieur de Soubize en nostre ville de la Rochelle, pour induire les habitans d'icelle à se joindre à leur party, & qu'ils continuēt les mesmes menées & pratiques à l'endroit de nos autres subiets de la Religion pretenduë reformée, pour les attirer & engager sous diuers pretextes & vaines esperāces dās leur vniō. encores que nous voulions croire, que nosdits subiets aurōt assez de fermeté & de iugement pour ne pas se laisser de- ceuoir & surprendre à semblables artifices: & que considerans que nous les faisons iouyr en paix de la liberté toute entiere de l'exercice de leur Religio, du benefice de nos Edicts, & des choses qui leur ont esté par Nous promises, ils sçauront bien cognoistre que cette entreprise faite par les Anglois, ne peut auoir en effect aucun obiet ny fondement qui puisse regarder le bien de leur Religion, mais

que c'est vne volontaire aggression contre Nous,  
 contre ceste Couronne, & contre l'honneur de la  
 Nation, pour la defense desquels tous bons Fran-  
 çois tant Catholiques que de la Religion preten-  
 duë reformée, sont également obligez d'exposer  
 leur sang & leur vie enuers & contre tous: Ne-  
 anmoins afin que nosdits Subiets soient informez  
 de nos intentions sur les occurrences presentes, &  
 qu'ils ne puiffent estre circonuenus par les inuention  
 qui sont éployées pour les soustraire de leur deuoir  
 naturel, SÇA VOIR FAISONS, que Nous pour ces  
 causes & autres bonnes & grandes considerations  
 à ce nous mouuans, DE L'ADVIS de la Roynne  
 nostre tres-honorée Dame & Mere, de nostre tres-  
 cher & tres-amé Frere vnique le Duc d'Orleans,  
 des Princes, Officiers de nostre Couronne, prin-  
 cipaux Seigneurs & notables personnages de no-  
 stre Conseil d'Estat, & de nostre certaine science,  
 plaine puissance & autorité Royale, AVONS dit  
 & déclaré, disons & déclarons par ces Presentes  
 signées de nostre main, le Sieur de soubize, &  
 ceux de nos Subiets de quelque qualité & condi-  
 tion qu'ils soient, qui auront adheré, ou qui se  
 joindront au party des Anglois, qui les fauoriserō  
 & assisteront directement ou indirectement, au-  
 ront accez & intelligence, association & corres-  
 pondance avec eux en quelque sorte & maniere  
 que ce soit, ou qui autrement se d'epartiront de  
 l'obeyssance qu'ils nous doiuent Rebelles, Trai-  
 stres & Perfides à leur Roy, & Desertteurs de leur  
 Patrie, Criminels de leze-Maiesté au premier  
 Chef, & comme tels déclarons leurs biens, meu-



bles & immeubles, Offices & Charges à nous acquis & confisque: Et tous les Habitans de nos Villes qui adhereront aux entreprises, rebellion & desobeyssance des dessusdits, ou qui leur donneront entrée, passage, refuge, retraite & logement en icelles, & qui les y souffriront & assisteront: en quelque sorte que ce soit, leur aideront d'armes, viures & munitions, & autres choses quelconques; coupables des mesmes crimes, decheus de tous octroys honneurs, priuileges, franchises, immunités & droits qui leur pourroient auoir esté concedez par les Rois nos predecesseurs ou par Nous, sans esperance d'aucun reestablisement. Voulans qu'il soit procedé contre eux selon la rigueur de nos Ordonnances, par emprisonnement de leurs personnes, saisies de leurs biens, raselement & demolition de leurs maisons, sans aucun excepter, degradation des bois & autres choses qui en dependent, & qu'ils soient décheus du benefice de nos Edicts, mesme du renuoy en nos Chambres creées par iceux, sauf si dans huit iours apres la publication faite de ceste presente Declaration es costes de Poictou, Xaintonge & Aulnis, ils ne se départent de la dite rebellion, & se representent deuant nos Officiers de Villes des Xaintes, Nyort, Fontenay, Brouage, & autres plus éloignées, avec les submissions ordinaires, & que les Villes ne fassent les Declarations en tel cas requises dans ledit temps. Et d'autant que nous auons reconnu durant les derniers mouuemens, qu'aucuns de nos Subiets de laditte Religion pretenduë reformée adherans au party des rebelles, ont de

5  
coustume d'enuoyer leurs enfans, ou permettent  
qu'ils aillent porter les armes avec eux, demeurans  
de leur part en leurs maisons pour les garentir de la  
rigueur de nos Declarations, Nous voulons pour  
remedier à tels abus, que les Peres ou les chefs des  
maisons & familles, soient tenus & reputez pour  
adherer au party des ennemis, & qu'ils soient pu-  
nis en leurs personnes, biens & maisons, des pei-  
nes mentionnées en ces presentes, si leurs enfans  
ou autres parents demeurans ordinairement ou le  
plus souuent en leurs maisons, & n'ayans autre  
maison de leur chef que celle de leurs peres & pa-  
rens, y sont portans les armes, si ce n'est que les-  
dits Peres ou chefs de familles & maisons, nous  
seruent actuellement dans nos armées ou ailleurs,  
& font telle diligence de retirer leurs enfans ou  
parens, que nous ayons tout suiet de croire qu'ils  
n'y ont aucune part. Et pour le regard de tous nos  
autres subiets de la Religion pretendue reformée  
qui demeureront en l'obeyssance & fidelité qu'ils  
nous doiuent, sans adherer aux desseins des enne-  
mis, & autres pratiques, factions & menées con-  
tre nostre autorité, seruice & repos de nostre  
Estat, Nous voulons qu'ils iouissent plainement  
& paisiblement de la liberté de leur exercice, &  
de toutes les graces & concessions à eux faictes &  
accordées par le feu Roy nostre tres honoré Sei-  
gneur & Pere & Nous, lesquelles nous entendons  
garder & entretenir inuiolablement, mettant tous  
nosdits Subiets de laditte Religion pretendue re-  
formée, leurs familles & biens, demeurans en  
leur deuoir, en nostre protection & sauue garde  
speciale.

SI DONNONS EN MANDEMENT à nos amez & feaux les gens tenans nos Cours de Parlements & Chambres de l'Edict, que ces Presentes nos Lettres de declaration, ils facent lire, publier & enregistrer, & le contenu en icelles faire garder observer & executer exactement selon leur forme & teneur, mesmes à nos Cours de Parlements, pour le regard de l'execution & infliction des peines portées par ces Presentes, pour raison desquelles Nous leur attribuons toute iurisdiction & cognoissance priuatiuement ausdites Chambres pour les cas susdits, dont les coupables sont indignes & décheus de tous priuileges. Sans preiudice neantmoins de ceux qui seront pris par les Generaux & Chefs de nos Armées, Iuges de nos villes & Iurisdiccions, les Visbaillifs, Visseneschaux & Preuosts de nos chers & bien amez cousins les Mareschaux de France, desquels nous voulons que iustice soit faite promptement & sans remise, tant sur les personnes que sur les maisons & biens, par ceux qui les auront pris & arrestez en quelque lieu que ce puisse estre, & qu'ils soient punis & chastiez selon le contenu en ces Presentes, & la rigueur desdits Edicts & Ordonnances precedentes faites par les Roys nos Predecesseurs & Nous, & à cette fin que les procez leur soient par eux faits & parfaits selon la iurisdiction à eux attribuée: Enioignons à nos Procureurs generaux & leurs Substituts, de faire toutes poursuittes & diligences pour ce requises & necessaires. Mandons aussi aux Gouverneurs & Lieutenans generaux de nos Pro-



7  
uinces, Baillifs, Seneschaux, Vissenechaux, Pre-  
uosts de nosdits cousins les Marechaux de Fran-  
ce ou leurs Lieutenants, & tous autres nos Iusti-  
ciers, Officiers & Subiets qu'il appartiendra, de  
tenir la main à l'execution de ces Presentes, faisant  
saisir & arrester, courir sus & tailler en pieces, tous  
ceux de nos Subiets qui feront leuées & armeméts  
de gens de guerre soit par mer ou par terre, sans nos  
Commissions seellées de nostre grand seau: CAR  
tel est nostre plaisir. En témoin dequoy nous auons  
fait mettre nostre seel à cesdites Presètes. **DONNE**  
à Villeroy le cinquième iour d'Aoust, l'an de grace  
mil six cents vingt sept: & de nostre regne, le dix-  
huitieme. **Signe, LOUIS, Et sur le reply, Par le**  
**Roy, DE LOMENIE.** Et seellées du grand Seau de  
cire iaune. Et encor sur ledit reply est écrit.

*Leües, publices & registrees, ouïy & ce requerant le  
Procureur general du Roy, pour estre executees gardées  
& obseruées selon leur forme & teneur, & que coppies  
collaionnées aux originaux d'icelles, seröt enuoyees aux  
Bailliages & Seneschauſſees de ce ressort, pour y estre  
pareillement leües, publices, registrees, gardées & obser-  
uees à la diligence des Subſtituts dudit Procureur Gene-  
ral, ausquels enioinct d'y tenir la main, & certifier la  
Cour auoir cefait au mois. A Paris en Parlement le  
12. d'Aoust 1627.*

Signé,

D. TILLET.



